

Beberapa negeri di Pantai Barat rasai gegaran gempa

Oleh [Rafidah Mat Ruzki](#) - Februari 25, 2022 @ 10:48am
fidahruzki@bh.com.my



PUTRAJAYA: Beberapa kawasan di Pantai Barat Semenanjung iaitu Selangor, Perak, Negeri Sembilan, Melaka dan Johor mengalami kesan daripada kejadian gempa bumi berukuran Magnitud 6.1 yang berlaku di Utara Sumatra pada jam 9.39 pagi tadi.

Jabatan Metereologi dalam satu hantaran melalui Twitter, berkata pusat gempa bumi itu terletak di kedudukan 0.2° U dan 100.0° T dengan kedalaman 10 kilometer, 76 kilometer Barat Laut dari Payakumbuh, Indonesia.

Bagaimanapun, jabatan itu berkata, tiada ancaman tsunami susulan gempa bumi berkenaan.

Sementara itu, kakitangan di beberapa bangunan kerajaan di Putrajaya turut diarahkan keluar susulan gegaran kuat yang dirasai itu.

Difahamkan, antara yang diminta berkumpul di luar bangunan adalah kakitangan di Kementerian Wilayah Persekutuan (KWP) dan beberapa pejabat di Jabatan Perdana Menteri (JPM).

Turut merasa gegaran adalah penduduk di apartment sekitar Putrajaya yang memaklumkan merasakan gegaran dalam tempoh satu hingga dua minit.



Penduduk memeriksa kesan gempa bumi di Kampung Kajai, Pasaman Barat, Sumatera. - Foto AFP